

Giuanni Lilliu: « Sentidu de libbertade »

Nota de s'autori

Cun custu libburu benit inaugurada sa collana noa de sa CUEC, meda importanti poita aspirat a essiri sa collana chi cumprendit is operas is calis po su contenu sunt prus accanta a is aspiratzionis e a sa tradizioni de s'editori. Su nomini est, appuntu, Biblioteca CUEC.

S'occasioni est saludada cun gosu de s'autori de su libburu chi, in su specificu, tenit su depidu de torrai grazias a totu cussus chi ant inspirau (Antoneddu Giuntini po primu) e ant collaborau a normalizzai is testus in lingua sarda publicaus is prus, in felitzis tempus andaus, in su periodicu natzionalidariu "Nazione Sarda": Stefano Sanjust e Mario Puddu. Torru grazias puru a Pino Calledda po s'aggiudu pretziosu in su scèberu de is immaginis chi illustrant s'opera e a Paola e Daniela Zedda po sa digitalizatzioni fata cun diligentzia e cumpetentzia.

Ma su ringraziamentu prus sincheru e de coru dhu depu a s'amigu e collega professori Giulio Paulis, studiosu su prus eminenti in materia de lingua e linguistica sarda e intelletuali stimau, chi mi at onorau cun sa presentada de su libberu, veramenti esemplari, e at procurau sa bortada de s'italianu a su logudoresu nobili de su testu miu intitolau "La costante resistenziale sarda".

In su piticu de custu traballu si sposant articulus de storia, de archeologia, de politica, de lingua, de morali, e amenidadis e imaginis chi dhu faint prus attraenti. Issu bolit essiri in is intenzionis e de fatu unu contributu, unu donu, un'omaggiu a sa lingua nostra e cun sa lingua a sa terra nostra, mama nostra, sa Sardigna. A custa patria de arrexinis profundas, de memorias antigas, custu modestu scrittu donat dignidadi, onori auguriu de felitzidadi. Cresciada issa in su sentidu de sa libbertadi, in su gosu de s'autonomia, in sa paxi, s'amori e s'unioni de is fillus suos, oi e in su tempus benidori.

Sa causa bona de sa cultura e de sa lingua sarda si bincit si is sardus acquistant totus, puru in sa diversidadi de is opinionis e aspiratzionis insoru, sa idea sarda, sa cussentzia de su propriu essiri etnicu e sa storia profunda, sa dignidadi e s'orgogliu de si intendi populu identicu a issu e totu e a is valoris suos chi non sunt minoris de is aterus, ma cun custos aterus sunt prontus a chistionai, a dialogai, in su respiru de su mundu.

Tocat a fai unu arrexonamentu mannu e seriu asuba de is valoris de s'identidadi. S'essiri sardu nostru no s'intendit satisfau dae su depidu de sa storia. In custu mundu chi cambiat nosu puru, sardus, si depeus torrai a fai, si definiri in una identidadi noa. Una identidadi chi benit de is arrexinis profundas, ma chi castiat e chi progettat po su tempus chi at a bènniri cun ominis nous. Custa identidadi, custu valori de natura in medas sardus est ancora a su stadu de emozione, prus pagu de cussentzia, prus pagu de arrexonamentu. Sa nostalgia chi de tempus in tempus si portat unu balsamu de cunfortu in su logu nostru e si pigat a scoramentu in terra allena, no bastat po s'impresa chi nos aspetat.

Identidadi, autonomia est puru capatzidadi e intelligentzia de fai. Bolit nai caminai de séi, trassai is moris proprius e mirai a su puntu sceberau. Sa libbertadi at a bènniri, si is sardus no tenint timoria.

Nosu sardus seus unu populu feriu ne is seculus de su dominiu, ma ancora biu grazias a Deus.

GIUANNI LILLIU

Gianni Lilliu
Sentidu de libbertade
CUEC Editrice 2004